



Komunikado di Prensa RvC

Huramentashon di Presidente di CBCS

Willemstad/Philipsburg – Awe, dia 7 di ougùstùs 2020, den presensia di e gobernadornan suplente di Sint Maarten i Kòrsou, Sr. drs. R.A. (Richard) Doornbosch a hasi su huramentashon di kargo komo presidente di Centrale Bank van Curaçao en Sint Maarten (CBCS). Sr. Doornbosch a ser nombrá a base di e rekomendashon ku Hunta di Komisario di CBCS a hasi na e paisnan dia 11 di mart di 2020.

Richard Doornbosch (1973) ta ekonomista monetario i tin mas di 20 aña di eksperensia ku sektor finansiero, organisashon internashonal i atministrashon públiko. Te ku luna pasá, Sr. Doornbosch a fungi komo direktor ehekutivo suplente di Fondo Monetario Internashonal (IMF) na Washington D.C. Den e funshon ei, el a ko-dirigí e elektorado hulandes i belga ku ta parti di direktiva di IMF.

Sr. Doornbosch a duna di konosé ku su prioridat inmediato ta di duna sosten na gobièrnu di e dos paisnan pa atendé ku e impakto ekonómiko di COVID-19 i manehá e riesgonan pa stabilitat finansiero. Komo promé prioridat, mester sea restrukturá operashon di e institutonan problemátiko òf terminá nan na un manera ordená i prudente. Lo mester traha pa eliminá e retraso eksistente riba tereno di modernisashon di legislashon i supervishon di sektor finansiero. Banko Sentral mes tambe ta pasando den un transformashon, ku e meta di fortifiká su *governance* interno i desaroyá un kultura di trabou mas proaktivo i ku mas bista pa loke ta tuma lugá den e ambiente eksterno den kua e ta funshoná. Doornbosch ta kontentu ku e oportunitat di por dirigí resto di e proseso akí: ‘Ekspertisio di nos kolaboradónan ta mas aya di tur duda. Nunka mas konfiabilidad di Banko Sentral no mag bin den disputa’, segun e presidente nobo.

Ku nombramentu di Sr. Doornbosch, Hunta di Maneho di CBCS ta kompleto un biaha mas. Hunta di Komisario ta antisipá un kolaborashon berdaderamente fruktífero.

Willemstad, 7 di ougùstùs di 2020

CENTRALE BANK VAN CURAÇAO EN SINT MAARTEN